

## ԸՆՏՐՅԱԼԸ

Հոգու սրբազան կրրակով վառված  
Իջնում էր Մովսես լերան գագաթից,  
Իջնում էր ահեղ պատգամներն առած,  
Շրղթայից հանող Աստուծո մոտից:

5 Ու մինչ կանխատես աչքովն իր հոգու  
Տեսնում էր գալոցն իր ժողովրդի,  
Ու մինչ հրճվում էր... ահա ներքևից  
Ձայներ բարկության ու խառն աղմուկի...

10 Ու տեսավ Մովսես լերան բարձունքից,  
Ժողովուրդն էնտեղ ներքև, հովիտում  
Աստված է շինել ոսկուց, արծաթից,  
Պարում է շուրջը ու հարբած գոռում:

«Ինչո՞ւ մեզ բերավ Մովսես անապատ,  
Լի Եգիպտոսից ինչո՞ւ հանեց մեզ...  
15 Ո՞ւր է մեր սրխտորն ու սոխը առատ...  
էնտեղ հանգիստ էր ու լիքն էր էնպե՛ս...»

Գոռում է էսպես ու հարբած պարում:  
Ու... սուրբ Սինայի մըռայլ ամպերում  
Կանգնեց մարգարեն, նայեց դեպի վեր.  
20 «Մի՞թե այս ամբոխն իմ եղբայրն է, տեր...»

Լսում եմ ձայնըդ լեռների գլխին,  
Ծովեր եմ պատռում, անցնում անապատ,  
Հըրեղեն սյունով տանում իր ուղին,  
Նա մի՛շտ կասկածոտ, նա մի՛շտ հուսահատ...

25 Տանջանքի միջից նրկատում եմ ես  
Երկիրն ավետյաց հեռո՛ւ մըշուշում,  
Իսկ նա փոքրոգի, կույր ու կարճատես,  
Գերության սըխտորն ու սոխն է հիշում...

Եվ երբ ամպերում խոսում եմ քեզ հետ,  
30 Քեզնից փըրկության պատգամ եմ բերում,  
Նա էնտեղ ցածում մոլի՛, անհեթեթ  
Ոսկի է պաշտում ու հարբած պարում...

Ինչո՞ւ եմ, Աստվա՛ծ, քո վեհ պատգամներ,  
Իմ տանջանքն ինչո՞ւ...» Գոչեց զայրացած,  
35 Ու մեծ խորհուրդի քարյա տախտակներ  
Ժայռերի գըլխից թողեց դեպի ցած...

Բայց... մյուս առավոտ, երբ որ դեռ քընած,  
Հանգչում էր ամբոխն աղմուկից հոգնած,  
Իր ցուպը ձեռքին բարձրանում էր նա  
40 Դարձյալ միայնակ վե՛ր՝ դեպի Սինա: